



IE-MUNDE

Revúe in Interlingue-Occidental

Numeró 10 – Marte 2015

CONTENETE	Págine
Articul redactori	2
Novas de Interlingue-Occidental	3
Li munde in Interlingue-Occidental	7
Angul poetic: Du poemas ex li internet e un original poema	9
Angul litterari: Li irlandesi legende "Li Infantes del Rey Lir"	11
Angul Musical: Li canzon "Bella Adío" in Interlingue	14
Tema: PEGIDA. Li programma del strangi Facebook-gruppe "Patriotic Europeanes contra li Islamisation del Occidente" quel arangeat mass-demonstrationes in Germania	15
Interlingue in ciffres	18

Car coidealistes!

Noi celebra un litt jubilé! To es li número 10 del jurnal IE-Munde. E yo posse dir que yo es vermen fier e anc positivmen surprisat qualmen IE-Munde ha contribuet al developament del Interlingue-movement. Ante quin annus ante li publication de IE-Munde Interlingue esset presc invisibil in li monde del planlingues e multes pensat que li movement de Interlingue ha morit e it ne hay plu activistes e parlatores.

Nu Interlingue es present in li internet e anc li Interlingue-Union ha fat un historic passu in transformar se in un activ organisation. It esset li cooperation inter li Interlingue-Union e IE-Munde quel ha portat mult positiv resultates e have un grand efecte.

Yo peti vos car letores devenir un membre del Interlingue-Union. Un planlingue ne posse esser visibil e functionar sin un activ organisation. Un bon exemple es li lingue Lingua Franca Nova (LFN). It ne have un organisation e existe solmen virtualmen in li internet. Pos mult bon activitás LFN deveni min e min visibil e it manca cooperation inter li activistes.

Ma qualmen es li actual situation de Interlingue? Li Interlingue-Union ha transformat se in un activ organisation in quel chascun person posse adherer gratuitmen. Con Cosmoglotta e IE-Munde noi have adminim chascun triesim mensu un nov jurnal in Interlingue. Li internet-págine de IE-Munde contene mult materiales quam textus, grammaticas, dictionariums e videos por aprender Interlingue e ha remplazzat li old págine del Interlingue-Union quel esset deletet ante plu quam un annu. Interlingue es tre activ in li social retage Facebook per un activ gruppe con circa 90 membres. Yo ha comensat far videos in Interlingue por You Tube. Li Wikipedie de Interlingue cresce constantmen e va atinger bentost 3000 articules. E li max mult important cose: omni ti activitás es coordinat. In li futur li Interlingue-Union deve luder un plu important rol precipue in li coordination de activitás. Li old problema del mancant communication es superat con li auxilie del internet. To omnicos eveni in un bon atmosfere. Yo deve constatar que it es vermen agreabil esser activ por Interlingue!

Hay ancor mult por far e Interlingue ancor besona mult auxilie de noi. Ma yo deve pensar a un old canzon ex li annus 80s de Samantha Fox con li titul: "Nequo va stoppar me nu!" (*Nothing gonna stop me now!*). Yo vell remplazzar li "yo" per "noi" e vell joyar si vu auxilia me in li mult taches.

Apu li nov activitás de Interlingue vu trova anc in ti numeró de IE-Munde novas ex li tot monde ex diferent temas quam politica, psicologie e scientie.

In li angul litterari vu trova denov du bell traductet poemas ex li internet de Michelle e ella ha scrit un litt poema originalmen in Interlingue. Michelle anc ha traductet por nos li famosi canzon "Bella Ciao" quel es un conosset canzon de partisanes. Ti-ci canzon esset anc cantat sur li celebration del grec levul-coalition Syriza pos su victorie in li grec electiones parlamentari in li januar 2015.

Pos du fabules del fratres Grimm yo ha traductet por ti numeró de IE-Munde li irlandesi fabul "Li infantes de

Lir".

In Germania li tema immigrantes e refugientes e li tema islam es mult discusset. Inter decembre 2014 e januar 2015 in Dresden evenit grand demonstrationes contra li "islamisation del occidente" per un strangi organisation con li nómine PEGIDA – "Patriotic Europeanes contra li Islamisation del Occidente". Li german politica e medies reactet quasi histericmen a ti fenomen. Ma quo vole PEGIDA vermen? Yo ha traductet li programma de ti organisation por far possibil un plu rasonabil e objectiv discussion pri ti gruppe.

Yo desira vos un plesent letura! Quam sempre yo vell esser joyosi pri vor opinionones e comentaries pri li numeró 10 de IE-Munde. Yo mersia Michelle pro su contributiones por ti numeró e li seniores Plavec e Werner pro li corecturas.

Vor Thomas Schmidt



NOVAS DE INTERLINGUE-OCCIDENTAL

INTERLINGUE-UNION TRANSFORMA SE IN ACTIV ORGANISATION

It esset calm pri li Interlingue-Union in li passat annus. Li activistes del Interlingue-Union con Senior Erich Werner de Svissia quam secretario e Senior Bedrich Plavec de Tchech Republica quam redactor de Cosmoglotta esset ocupat con li publication de Cosmoglotta. Ma pos li mini-incontras de Interlingue inter Senior Erich Werner, Donald Gasper e li redactor de IE-Munde Thomas Schmidt on decidet in comun con Senior Bedrich Plavec transformar li Interlingue-Union in un activ organisation a quel chascun person posse adherer. Un financial contribution ne es necessari, ma chascun membre recive gratuitmen li jurnal Cosmoglotta e li electronic jurnal IE-Munde. In ocasion de ti historic passu, anc IE-Munde publica li invitation al membritá in li Interlingue-Union.

It es certmen un historic document por li movement de Interlingue.

INVITATION AL MEMBRITÁ IN LI INTERLINGUE-UNION

In li januar 2013 event li unesim litt incontra de Interlingue inter li activistes de Interlingue Erich Werner, Donald Gasper e Thomas Schmidt. Li discussion qualmen crear un plu activ movement de Interlingue continuat depoy. On consentit que li Interlingue-Union deve esser in li centre de un tal iniciative.

Desde li demission caus avansat etá del legendari equip de Alphonse Matejka quam redactor e Fred Lagnel quam administrator li Interlingue-Union ha concentrat se sur li publication de "COSMOGLOTTA – Oficial organ del Interlingue-Union" por mantener Interlingue visibil e vivent.

Interim, in li curse de annus li Interlingue-Union ha perdit mult membres pro alt etá o morte, ma anc ganiat un númer de abbonates de COSMOGLOTTA sin membritá. In ti situation it apare nos important prender mesuras por ne finir in un sol adressarium.

Pro to, noi peti vos revalidar vor membritá o declarar vor adherentie al Interlingue-Union.

In li actual situation un obligatori financial contribution al membres ne es demandat – li custas vell mult probabilmen superar li recibages. Vu trova sur li reverse li statutes del IU. Tis-ci contene anc institutiones queles es actualmen vacant, ma hay li possibilitá refundar les, si hay suficient qualificat persones.

Li membres del Interlingue-Union va automaticmen e gratuitmen reciver li digital versiones de COSMOGLOTTA (paperal version sur demande) e del jurnal IE-Munde. Inter li membres del IU noi intente establissar un constant communication con informationes pri activitá e projectes. Por devenir plu visibil, li lingue de Edgar de Wahl besona vor moral e si possibil activ suport.

Dunc ples plenar e inviar li includet carte de response o adressar un e-mail al administration! Vu es cordialmen invitat al membritá. Mersí por vor solidaritá e vor simpatie por li lingue de Edgar de Wahl!

Ma noi ja have mult taches: Li publication del jurnal Cosmoglotta, un nov internet-págine por li Interlingue-Union, li publication de libres e e-libres, discusser propositiones e far recomandationes por nov paroles, informar li publica pri Interlingue, far Interlingue plu visibil in scientific circules e plu mult. Li nov Interlingue-Union anc va organizar incontras e congresses. Ma por realisar to, ples plenar li sequent formulare! Vu es invitat al membritá del nov Interlingue-Union:

INTERLINGUE-UNION

Bedrich Plavec

Erich Werner

Redactor de COSMOGLOTTA

Secretario del IU

Decembre 2014

Li Carte de adhesion al Interlingue-Union. Vu trova it in li internet ci:

<http://www.ie-munde.com/interlingue-union.html>

The image shows a screenshot of a web form titled "CARTE DE ADHESION AL INTERLINGUE-UNION". The form is divided into several sections:

- Registrat adresse:** A white rectangular box for the registrant's address.
- Eventual corecturas del adresse:** A yellow rectangular box containing three horizontal dashed lines for corrections.
- E-mail-adresse:** A line with a dashed underline for the email address.
- Options:** Two checkboxes and two radio buttons.
 - Yo adhere al INTERLINGUE UNION quam activ membre, sin financial obligation.
 - Yo desira receiver COSMOGLOTTA sin custas
 - in paperal form
 - in electronic form al supra-indicat e-mail-adresse
- Remarcas:** A line with a dashed underline for remarks.
- Date:** A line with a dashed underline for the date.
- Signatura:** A line with a dashed underline for the signature.

INTERLINGUE VIDEOS CHE YOU TUBE

On di hodie que un cose o organisation ne existe in nor digital témpor si it ne es present in li social retage Facebook e sur il video-platform You Tube. Interlingue es desde quelc annus tre succesosi activ che Facebook per un gruppe quel have circa 90 membres. E desde li januar 2015 nu Interlingue es anc present che You Tube. Yo ha fat tri curt videos con mi smartfon in queles yo parla Interlingue. In li februar 2015 yo fat li unesim video por aprender Interlingue. Quam lingue de instruction yo ha usat anglesi, pro que yo pensa que max mult persones comprende anglesi, certmen plu quam mi lingue matrin german. In un altri video yo presenta un original poema in Interlingue de me. Yo ha mettet un transcription de to quo yo di in Interlingue sub li video self. Ples regardar li videos e claccar li famosi "Like"-buton (yo-ama-it-buton) si vu have un conto che You Tube. Vu anc posse scrit ta un comentu.

Mi canal che You Tube: <https://www.youtube.com/channel/UCIPu6pdnCKtUr59z3hhZX5g>

COSMOGLOTTA 318 ES PUBLICAT

Ja quelc dies ante Crist-nascentie 2014 li numeró 318 del revúe Cosmoglotta esset publicat. It contene ott págines scrit in Interlingue e du anexes. It contene li sequent temas.

- Parol de Editores, p. 9. (Information que li Interlingue-Union transforma se in un activ organisation).
- Erich Werner: AlpTransit rula ad-avan, p. 10-11.
- Erich Werner: 20 annus “nov” historic ponte in Luzern, p. 12-13.
- Erich Werner: Pri li historie del jure, p. 13.
- Li max old dessine architectural del Occidente, p. 14. Secun Konrad Hecht, Der St. Galler Klosterplan 1982.
- Pri li dulci puré, p. 15. Fabul del fratres Grimm traductet de Thomas Schmidt.
- Ultim págine: Li max mult mortal dramas de Shakespeare, p. 16.

Quam anexe li numeró 318 de Cosmoglotta contene un invitation al membritá del Interlingue-Union e un carte de adhesion per quel on posse devenir un membre de Interlingue-Union e li actual statute de Interlingue-Union. Vu posse leer li digital version del actual Cosmoglotta sur li internet-págine de IE-Munde.

IE-WIKIPEDIE E INTERLINGUE CHE TATOEBBA CRESCE

Li annu 2014 esset anc un successosi annu por Interlingue in li internet. Mi scope que li IE-Wikipedie have plu quam 2500 articules til li fine del annu 2014 esset ja tostmen atinget. It finit li annu mem con plu quam 2600 articules. Pro que in li Wikipedie del planlingue Novial esset mult vacui articules deletet, li Wikipedie de Interlingue es inter li planlingues queles es representat in li oficial Wikipedie detra Esperanto, Volapük, Ido e Interlingue nu sur li 5-im rang e it es avan Novial e Logplan. Mi scope por li annu 2015 es ambitiosi. Yo desira que li númere del articules va crescer til li fine del annu a 3000.

Yo tre joya pri li max nov e max yun autor del IE-Wikipedie. Mi filio qui es un grand entusiasto de sport, ha comensat scrir e suplementar sport-articules in li IE-Wikipedie e il anc comensat aprender Interlingue!

Anc che li internet-platform Tatoeba li númere de frases in Interlingue ha crescet mult in li annu 2014 e in li comense del annu 2015. In li marte 2015 noi atinget ja li 3000 frases e Interlingue es ye li 51-im rang avan mult europan e altri national lingues quam estonian, slovenian o urdu.

Yo vole mersiar omni autores e corectores del IE-Wikipedie e de Tatoeba! Yo espera que vu continua vor bon labore!





LI MUNDE IN INTERLINGUE-OCCIDENTAL

STUDIANTA DEL REYATU UNIT VOLE PARTURIR UNESIM BEBÉ SUR MARS



Li projecte MARS-ONE (Mars-un) vole fundar un colonie de homes sur li planete Mars. Secun li planes li colonisation del rubi planete deve comensar in li annu 2025, ma ja hodie posse anuciar se voluntarios por ti mission. It ne es planat que li astronautes retorna al Terra, ma ili deve restar sur Mars. Li selection de astronautes ha ja comensat. Inter ili es anc li studianta Maggie Lee del Reyatu Unit, qui have 24 annus. Ti studianta de astrofisica in Birmingham have un extraordinari desire. Ella vole parturir li unesim bebé sur li rubi planete. Maggie Lee dit pri to: "Yo pensa que to va esser un bon afere pro que ti infante qui va nascer sur Mars va esser li unesim marsane!"

PER UN BESA ES EXCHANGEAT MILLIONES DE BACTERIES

Li jurnal diari "Daily Mail" del Reyatu Unit scri que per un besa un cuple exchangea circa 80 milliones bacteries si li besa dura circa 10 secondes. To asserite nederlandesi scientistes. Chascun hom have trillions de bacteries in su córpor e ili forma un propri microflora. Pro to have pares qui besa se chascun die un simil microflora. Li consequenties ne es negativ, totmen li contrarie. Per to li córpores posse plu bon combatter contra infectiones. Ne malgré ma pro li exchangeamentes de bacteries besar se es salubri.

(Michelle)

NIGRI E RUBI QUAM COLORES DEL SEX

Secun psicologos sex deveni plu erotic si féminas porta nigri o rubi vestimentes. Rubi e nigri have secun expertes su fix loc in li erotic fantasie. Sur internet-páginas por erotic incontras li féminas porta max sovente nigri subvestimentes. Nigri simbolisa potentie, ma it es anc misteriosi. Por aproximar se on deve superar timores e tabús. Ti transgression de psicologic barrieres crea sexual voluptá.

Ma li color rubi es li color de sexual activitá itself. It sembla que ti color atrae mannes magicmen. Mannes egarda féminas in rubi quam plu liberal in li sexualitá. Secun studies anc féminas qui intende curt amorosi aferes es vestit plu quam du vezes tam sovente in rubi vestimentes.

(Michelle)

AUSTRALIA VA PARTIPRENDER IN LI EUROVISION SONG CONTEST 2015



Li 23-im may 2015 va evenir in Vienna li 60-im Eurovision Song Contest. Li Eurovision Song Contest es li max grand competition de musica sur li monde. In it posse partiprender solmen li landes queles es membres del Union Europan de radio-television (UER) qui opera Eurovision por li exchange de television e radio-programmas.



Nam li Eurovision Song Contest atrae anc mult attention éxter Europa. In Australia hay mult adherentes de ti eveniment. E pro to li Eurovision ha decidet que Australia posse partiprender ho-annu quam exception un vez in li Eurovision Song Contest. In li casu que Australia gania li eveniment li sequent Eurovision Song Contest ne va evenir in Australia. Til nu it esset li regul que li victor del competition arangea in li sequent annu li eveniment. E solmen in li casu si Australia vell ganiar in Vienna, it vell esser representat anc in li annu 2016 in li Eurovision Song Contest. In Australia on ja discusse qui va representar li land in Vienna. Li famosi gruppe del rock-musica AC/DC es de Australia, ma anc li cantatora del pop-musica Kylie Minogue. Australia es directmen qualificat por li finale in Vienna quel eveni in li véspere del 23-im de may 2015, ma in Australia to es ja li matine del 24-im de may pro li diferent témpor-zones.





ANGUL POETIC

In nor angul poetic hay du traductet poemas ex li internet e un original poema de Michelle.

TRO BELL POR ESSER VER

Omnicos es perfect, omnicos es fabulosi,
yo es vermen totmen corageosi.

Mi vive es perfect quam un reve,
un dom, quel have un grand chambre.

Subitmen yo vide un grand parete,
con flores sur li tapete.

Yo constata que yo es in mi chambrette,
omnicos esset solmen in mi cerebre.

It esset tro bell por esser ver,
in li realitá yo deve viver.

(Traductet ex li internet de Michelle)

MI AMORE

Si mi amore vell esser un mare, it ne vell exister land.
Si mi amore vell esser un deserte, on solmen vell vider sand.
Si mi amore vell esser un stelle, quel splende,
li ciel vell brilliar til li fine del monde.

(Traductet ex li internet de Michelle)

LAURA

Ella have un cert aura,
su nómine es Laura.
Omnes ama la,
to es li veritá.

Tu monstra li stelles a me,
nequí posse obliviar te.

Tui voce es quam musica,
in un sinfonie de bellitá.

Tui capilles brillia in li luce,
ne cela les sub un capuce.

Yo jui chascun minute con te,
it es li paradise por me.

Aperte por me li monde,
volant sur un unde.

(Poema original de Michelle)

ANGUL LITTERARI

LI INFANTES DEL REY LIR ***- UN IRLANDESI LEGENDE -***



(Traductet ex li german de Thomas Schmidt)

Fionnuala esset un princessa. Ella havet tri fratres: Aodh, Fiachra e Conn. Fiachra e Conn esset gemelles e tre savagi. Solmen in li fine del die quande lor matre – li reyessa - cantat les in li dorme, it devenit tranquil.

Ma li reyessa morit e por un long témpor grand luctu dominat. Tande Rey Lir maritat denov. Aoife, su nov marita, esset tre bell. Nequí savet que ella esset un maliciosi sorciera. Ella esset jalusi pro que Lir tre amat su infantes e ella comensat odiar les. Ella precipue odiat quande Fionnuala cantat li canzones de su matre por Conn e Fiachra, nam li propri voce de Aoife esset tam desbell quam li voce de un cornille. Un die ella dit a Fionnuala: "Ea e aporta tui fratres. Noi va visitar vor grand-patre."

Ili intrat in li carosse de Aoife e ili ancor ne hat vehiculat lontan quande ili haltat che un lago. It esset un calid die e li sole brilliat.

"Vu posse ear svimmar mi gallinelles", Aoife dit.

Fionnuala esset inquietat. Pro quo esset Aoife tant afabil? Ella altrivez ne esset afabil a ili.

"Halta!" ella vocat a su fratres,"ne ea in li aqua!"

Ma it esset tro tard. Aodh ja svimmat in li centre del lago. Conn e Fiachra esset tre savagi e asperset se unaltru con aqua. Fionnuala eat al rive e vocat su fratres denov.

Ma Aoife brandisset su vergette e insorciat li infantes ... Fionnuala sentit se subitmen tre strangi. Ella videt quande crescet a su brasses e gambes plums. Su fingres del pede recivet svim-membranes quam un anate. Ella regardat su fratres e a ili evenit li sam cose. Li quar infantes hat desaparit e in vice de ili esset nu quar cignes in li aqua. Aoife stat ridachant al rive del lago.

"Nu vu posse cantar quant vu vole!"

Tande ella dit su sorcie:

"Vu va esser cignes por nincent annus.

Vu va passar li unesim tricent annus ci.

Vu va habitar li sequent tricent annus in li nordal mare.

E vu va passar li ultim tricent annus in li westal mare.

Solmen li son de un cloche va redempter vos.

E tande vu va devenir homes denov."

Conn e Fiachra comensat plorar. Fionnuala vell har volet anc plorar, ma ella dit: "Noi va volar a nor patre e narrar a il quo ha eventit." Ili raportat a Rey Lir to quo Aoife hat fat e Lir devenit tre furiosi. E anc il posset sorciar e il transformat Aoife in un abominabil nigri cornille. Con despitant croacada li cornille forvolat del palace. Ma Lir ne posset abolir li magic bann quel esset sur su infantes.



Dunc il eat chascun die al lago. Il sedet che li rive e escutat lor cantada. Quande li rey morit, li infantes continuat venir al loc u il hat sempre sedet por cantar juntmen e por comemorar lor patre. Quande tricent annus hat passat, li quar cignes devet forlassar li lago.

Ili volat al nordal mare, u li mare rabiato e li aqua battet tant alt undes que li cigne-infantes esset immerset quande ili provat reposar se. Li vente esset frigid quam glacie e quelcvez lor pedes congelat fixmen al roccas. Ili movet sovente tre proxim unaltru e tande Fionnuala expandet su ales súper su fratres por calentar les. Finalmen li tricent annus hat passat. Li cignes volat súper Irland al westal mare. Ta esset litt insules u li cigne-infantes posset reposar se sur moll herbe in vice de seder sur dur roccas. Lor preferet insul esset Inish Glora. Ili regardat quande li sole descendet súper li mare e ili cantat con bass voce lor cigne-cantada. Li homes qui passat al insul sur naves escutat les cantar e pensat que ili audit li cantada de nixes.

Un die quande ili piscat, Fiachra, Conn e Aodh venit a Fionnuala. Conn dit: "Sur Inish Glora eventit alquó

strangi."

Li quar cignes volat al insul. Ta ili videt un sant mann qui constructet un cabane ex lápides. Il cantat quande il laborat. Quande il hat finit, il fixat sur li tegment del cabane un brilliant cose. It esset un cloche.

Li vente sufflat e li cloche comensat clochear. Li infantes nequande hat audit un tant bell son. Li sant mann regardat a supra al quar tre bell cignes, qui girat súper il.

"Veni de supra mi amicos", il dit. "Yo ha escutat vos cantar. Veni de supra e lass nos cantar juntmen."

Ma tam bentost quam li quar infantes aterrat sur li insul, alquó tre strangi evenit. Li plums cadet de ili al terre e li svim-membranes a lor pedes desaparit.

Fionnuala regardat su fratres. Ella videt tri tre old mannes. Ella self esset un tre old fémina.

Li sant mann regardat les tristmen. Il conosset li old racontas e savet nu que to esset li infantes del rey Lir e que ili va morir.

Ma Fionnuala subridet e dit: "Ne esse trist! Noi es tre fatigat. Noi havet un tre long vive – mult tro long. Noi es felici que noi posse dormir ci sur vor insul." Li sant mann baptisat li quar infantes. Pos to ili jacentat se sur li moll herbe apu li litt cabane. E omni avies del insul volat a ili por cantar les in li dorme.



ANGUL MUSICAL



BELLA ADÍO

Pos li successe del grec levul-coalition Syriza in li parlamentari electiones esset un grand celebration. Ta anc esset cantat un old canzon del italian partisanes del Duesim Guerre Mundal quel es famosi sur li tot monde: *Bella Ciao*. Yo fat un version in Interlingue de ti canzon con li titul "*Bella Adío*".

BELLA ADÍO

Un matine yo ha avigilat me,
O bella, adío! bella, adío! bella, adío, adío, adío!
Un matine yo ha avigilat me,
E yo trovat li invasor.

O partisan, prende me con te,
O bella, adío! bella, adío! bella, adío, adío, adío!
O partisan, prende me con te,
nam yo time que yo va bentost morir.

E si yo mori in li montes,
O bella, adío! bella, adío! bella, adío, adío, adío!
E si yo mori in li montes,
Tande tu deve sepulter me.

E sepulte me supra in li montania.
o bella, adío! bella, adío! bella, adío, adío, adío!
E sepulte me supra in li montania.
Sub li ombre de un bell flor.

E omni homes qui ta preterea,
O bella, adío! bella, adío! bella, adío, adío, adío!
E omni homes qui ta preterea

va dir me: Qual bell flor!

To es li flor del partisanes,
O bella, adío! bella, adío! bella, adío, adío, adío!
To es li flor del partisanes,
quel morit por li libertá.

(Traductet de Michelle ex li german e italian)

TEMA: PEGIDA

Li programma del strangi Facebook-gruppe "Patriotic Europeanes contra li Islamisation del Occidente" quel arangeat mass-demonstrationes in Germania.



Demonstration de PEGIDA li 25-im de januar 2015 in Dresden

Un facebook-gruppe de Dresden con li abreviation PEGIDA – to significa "*Patriotic Europeanes contra li Islamisation del Occidente*" devenit un fenomen del german politica. Nu hay ja PEGIDA-gruppes in mult cités e mem éxter Germania. PEGIDA demonstrat chascun lunedì in Dresden contra "li islamisation del occidente" e plu e plu homes venit. In li januar 2015 it ja esset 25.000 cives. Li medies e politicos ataccat tal gruppe fortmen e titulad it "dextri-extremistic", "neo-fashistic" e "hostil contra immigrantes", ma scientific analyses monstrat que li grand majoritá del demonstrantes ne esset dextri-extremistes.

In li fine it ne esset li histeric reaction del politicos e medies, ma interni queeles queles debilitat PEGIDA. Li initiator de PEGIDA Lutz Bachmann posat transvestit quam Adolf Hitler por un foto sur su Facebook-págine. Il dit que it esset solmen un satire pro li film-version del satiric libre "Il ha retornat" in quel Hitler avigilat se in li modern Berlin. Bachmann anc defamat sur su Facebook-págine immigrantes in un tre primitiv maniere. Li

altri organisatores de PEGIDA quam Kathrin Oertel demandat que Bachmann se retira ex PEGIDA. Bachmann fat to solmen por un brevi periode de témpor. Pro to Oertel e altri co-fundatores de PEGIDA forlassat li organisation in li comense de februar 2015 e fundat su propri organisation "Direct Democratie por Europa". Pos ti interni conflictos li númeres de demonstrantes diminuet se a quelc milles, ma li tema de islam e immigration restat in li publica present.

Ma quo vole ti strangi gruppe vermen? Li sol programma de PEGIDA es un tal nóminat "Papere de positiones de PEGIDA". Benque li gruppe de PEGIDA es ja separat in un moderat e un plu extremist fraction e li importantie de PEGIDA ha diminuet mult nu, yo pensa que it es important conosser su political position independentmen ca on consenti o ne con ti organisation. Pro to yo traductet li central document de PEGIDA por crear un base por un discussion pri ti fenomen.

Mi personal opinion pri it es que it ne es un ver political programma, ma un collection de populistid idées. It sembla a me que mult germanes ne leet ti position e have un fals opinion pri PEGIDA, ma on deve anc questionar si ti programma have in tot un importantie.



Kathrin Oertel -un del initiatores de PEGIDA sur un demonstration

Vu anc posse trovar informationes pri PEGIDA e su organisatores in li Wikipedie de Interlingue!

Sercha in li Wikipedie de Interlingue: PEDIGA. Kathrin Oertel, Lutz Bachmann, Direct Democratie por Europa

PAPERES DE POSTIONES DE PEGIDA

1. PEGIDA es POR li acceptation de refugitores ex guerres e persones qui es persecutet pro religiosi motives.
2. PEGIDA es POR li acceptation del jure e obligation al integration in li constitution del Federal Republica Germania. (til nu solmen li asil-jure es in li constitution)!
3. PEGIDA es POR li decentral acomodation de refugitores ex guerres e persones qui es persecutet in

vice de un acomodation in hemes queles es contra li homan dignitá.

4. PEGIDA es POR un repartition del refugitores in tot Europa secun un cert clave de repartition e un just repartition sur li eposes de omni membre-states del European Union! (Central Autoritá por li Registration de Refugitores, quel tande es simil al intra-german clave de repartition de Königstein, reparti li refugitores in li membre-states del European Union).
5. PEGIDA es POR li diminution del relation in li númeres inter persones qui peti asil e auxiliatores e social-laboreros del state qui cuida pri li refugitores (nu li relation es circa 200 refugitores contra un social-laborero o auxiliari person del state; in facte to ne es un custodie por persones qui es partialmen traumatisat).
6. PEGIDA es POR un processu del asil-solicitation secun li exemple del nederlandesi e sviss modelle e til li introduction de it, POR un augmentation del financies por li Federal Oficie de Migration e Refugitores (Bundesamt für Migration und Flüchtlinge) por diminuer mult li durada del procede e perlaboration del asil-solicitation e por far possibil un plu rapid integration!
7. PEGIDA es POR li augmentation del financies por li policie e CONTRA acurtar li númeres de policistes.
8. PEGIDA es POR li exhaustion e implementation del existent leges pri li tema asil e expulsion!
9. PEGIDA es POR un politica de null-tolerantie contra criminal asil-serchantes e inmigrantes.
10. PEGIDA es POR li resistentie contra un violent political ideologie quel es hostile contra féminas, ma ne contra li ci habitant e se integrant musulmanes!
11. PEGIDA es POR immigration secun li exemple de Svissia, Australia, Canada o Sudafrica.
12. PEGIDA es POR li sexual self-determination!
13. PEGIDA es POR li conservation e protection de nor crist-judéic occidental cultura!
14. PEGIDA es POR li introduction del plesbiscites secun li exemple de Svissia!
15. PEGIDA es CONTRA li liveration de armes al anti-constitutional e prohibit organisationes quam por exemple li Communist Partise de Kurdistan.
16. PEDIGA es CONTRA li admission de paralel societés/paralel tribunales inter nos quam Sharia-tribunales, Sharia-policie, arbitre-judicos etc.
17. PEDIGA es CONTRA ti alienat "gender mainstreaming", quel es nominat anc sovente "genderisation", to es li obtrusiv, politcal corect neutralisation del sexus in nor lingue!
18. PEGIDA es CONTRA radicalisme independent si it es religiosimen o politicalmen motivat!
19. PEGIDA es CONTRA predicatoros de odie, egal a quel religion ili apartene.

(Traduction ex li german. Li papere esset publicat per PEGIDA in li internet)

INTERLINGUE IN CIFFRES



Númère del articules in li Interlingue Wikipedie (22-im de marte 2015): 2792

Númère del membres in li Interlingue-Occidental gruppe de Facebook (22-im de marte 2015) : 90

Númère de frases in Interlingue sur li internet-págine Tatoeba:(51-esim rang inter 180 lingues li 22-im de marte 2015): 3061

QUELC LIGAMENTES DE INTERLINGUE-OCCIDENTAL IN LI INTERNET

Internet-págine de IE-Munde <http://www.ie-munde.com>

Information pri li Interlingue-Union: <http://www.ie-munde.com/interlingueunion>

Li gruppe de Interlingue-Occidental che Facebook <http://www.facebook.com/groups/403123056383240/>

Li Yahoo Gruppe de Interlingue-Occidental <http://de.groups.yahoo.com/group/interlingue-occidental/>

Li Interlingue Wikipedie <http://ie.wikipedia.org>

Blog de Thomas Schmidt in Interlingue <http://interlingue.blogspot.com/>

Cosmoglotta. Modern numerós del organ del Interlingue-Union <http://cosmoglotta.narod.ru/>

Puelleses. Blog de Michelle in Interlingue <http://puelleses.wordpress.com/>

Interlingue canal che You Tube <https://www.youtube.com/channel/UCIPu6pdnCKtUr59z3hhZX5g>

IE-Munde

Redaction: Thomas Schmidt

Contributiones de: Thomas Schmidt, Michelle

Corecturas: Bedřich Plavec, Erich Werner